

**ACORDO DE COLABORACIÓN ENTRE A CONSELLERÍA DE ECONOMÍA, EMPREGO E INDUSTRIA DA XUNTA DE GALICIA E A FUNDACIÓN DE FEIRAS E EXPOSICIÓN DE A ESTRADA, PARA A FINANCIACIÓN CONXUNTA DUN CAMBIO DE ILUMINACIÓN EFICIENTE E PINTADO EXTERIOR NO RECINTO FEIRAL.**

En Santiago de Compostela, a dezasete de xullo de dous mil dezanove, na sede da Consellería de Economía, Emprego e Industria.

**REUNIDOS**

Dunha parte D. \_\_\_\_\_, conselleiro de Economía, Emprego e Industria da Xunta de Galicia, nomeado para o devandito cargo polo Decreto 135/2017, de 28 de decembro, actuando en exercicio das competencias atribuídas polo artigo 34 da Lei 1/1983, de 22 de febreiro, de normas reguladoras da Xunta de Galicia e da súa Presidencia.

E doutra, D. \_\_\_\_\_, en calidade de Presidente Executivo desta Fundación, e por tanto representante legal da Fundación Feiras e Exposicións de A Estrada, tal e como se establece no artigo 26 dos Estatutos desta Fundación.

Interveñen en función dos seus cargos respectivos e no exercicio das facultades que, para convir en nome das entidades que representan, teñen e

**EXPOÑEN**

PRIMEIRO.- A Consellería de Economía, Emprego e Industria, en adiante, a consellería, segundo o artigo 1 do Decreto 135/2017, do 28 de decembro, polo que se establece a estrutura orgánica da Consellería de Economía, Emprego e Industria, é o órgano da Xunta de Galicia ao que lle corresponde o exercicio, entre outras, de competencias en materia de comercio interior e especificamente, a promoción, fomento, modernización, desenvolvemento do comercio e a programación e xestión de axudas destinadas a estes fins, o impulso do asociacionismo comercial e da asistencia técnica comercial en colaboración con outras institucións e entidades. Concretamente, o programa 751A, que xestiona a Dirección Xeral de Comercio e Consumo, contempla a renovación do sector do comercio e a promoción de sectores e produtos galegos, apoiando as actuacións desenvolvidas polas fundacións feirais para acadar o nivel de competitividade desexábel cara os mercados nacionais e internacionais e que incidan no seu maior desenvolvemento e viabilidade.

SEGUNDO.- A Fundación de Feiras e Exposicións de A Estrada, no sucesivo, a fundación, parte integrante do sector público autonómico, ten como obxecto a consecución de fins xerais de interese galego no ámbito sectorial do comercio, ao que a súa denominación e fins se contraen, sendo unha das súas finalidades primordiais a realización de actividades promocionais, e a tal fin vén desenvolvendo no recinto feiral que xestiona, actuacións que se concretan fundamentalmente en feiras, certames e exposicións. Preténdese incrementar a mellora do recinto e a modernización das súas infraestruturas mediante a execución dos traballos enumerados no Anexo I deste acordo, sen prexuízo das actuacións preparatorias que sexan precisas.

TERCEIRO.- As partes consideran que a mellora das infraestruturas do recinto feiral e a posta en valor dos seus recursos favorece o desenvolvemento de actividades nas súas instalacións e a viabilidade do mesmo, mediante a mellora das instalacións, por medio do pintado do exterior do pavillón 5 e da modificación da iluminación do pavillón 5. Dado o interese coincidente da consellería e a fundación, acordan a formalización deste acordo de colaboración, sen prexuízo das achegas que por medio doutros instrumentos podan instrumentalizarse para a consecución destas actuacións con outras administracións públicas, que tamén forman parte do padroado.

CUARTO.- A Lei 14/2013, do 26 de decembro, de racionalización do sector público autonómico, regula a colaboración no ámbito do sector público autonómico partindo dos principios de colaboración, cooperación e asistencia recíprocas coa finalidade de garantir a eficacia do sector público e o uso eficiente dos recursos públicos.

Prevese que esta colaboración no ámbito interno do sector público se faga efectiva a través de certos instrumentos tales como protocolos de colaboración, grupos de traballo, encomendas de xestión, acordos de colaboración ou cooperación para o desempeño de tarefas comúns e outros.

Neste sentido, a consellería ten a firme vontade de participar en actuacións no recinto da Fundación que redunden na súa mellora e optimización de todos os recursos existentes. A fundación ven xestionando de forma exitosa o recinto feiral e conta cos medios e o persoal necesarios para levar a cabo a contratación e a execución dos traballos enumerados no Anexo I, mediante a contratación conxunta nos termos anteditos recollidos na Lei 14/2013, posto que se trata de artellar un instrumento de cooperación dirixido a posibilitar a consecución dunha finalidade común para ambos os dous órganos. En definitiva, considérase oportuno e beneficioso para o interese público que a fundación lle preste a súa colaboración á consellería para levar a cabo a contratación conxunta dos traballos.

QUINTO.- O presente convenio incardínase no disposto no artigo 15 da Lei 14/2013, de cooperación para o desempeño conxunto de tarefas, mediante a participación efectiva no desenvolvemento dunha actividade común, e tal e como establece o artigo 15.4 da mesma Lei, o convenio atribuirá a tramitación e adxudicación do contrato ao órgano de contratación que conte cos medios técnicos máis especializados na materia obxecto do contrato, neste caso, a Fundación.

Tal e como establece o artigo 16. b), para a concreta contratación conxunta entre a consellería e a fundación, o órgano designado para a contratación conxunta será a Fundación, co pago da totalidade do prezo por parte da Consellería ao adxudicatario da licitación.

## CLÁUSULAS

PRIMEIRA.- Este convenio ten por obxecto establecer as bases de colaboración entre a Consellería de Economía, Emprego e Industria e a Fundación de Feiras e Exposicións de A Estrada, para o financiamento das actuacións que se enumeran no Anexo I no recinto feiral do que é titular a fundación, en concreto, ten por obxecto a licitación, adxudicación e execución dos contratos que sexan precisos para o cambio de iluminación e o pintado do pavillón 5.

SEGUNDA.- As partes obríganse ás seguintes condicións:

A consellería obrígase a realizar as seguintes actuacións:

- O financiamento do importe total do contrato tal e como se establece na cláusula terceira para o cal levará a cabo as actuacións contables necesarias para a execución orzamentaria da contratación xestionada pola Fundación.
- A Consellería colaborará, cando así llo solicite a fundación, no desenvolvemento das actuacións necesarias para levar a cabo as contratacións dos traballos.
- Prestar, cando lle sexa requirido pola fundación, en calquera das fases na que se atope a execución do presente acordo de colaboración a axuda e colaboración técnica necesaria para desenvolvelo satisfactoriamente.

A fundación obríganse a realizar as seguintes actuacións, no seu caso:

- Realizar os actos e negocios xurídicos propios da preparación, selección de contratista, adxudicación e execución de contratos públicos que sexan precisos para a execución do obxecto do convenio.

- Asumir, no caso de que así se requirise, a realización das xestións pertinentes ante os organismos que correspondan, para a obtención dos permisos, licenzas ou autorizacións regulamentarias, no seu caso, que necesariamente deban ser solicitadas pola fundación.

Calquera competencia que lles corresponda en virtude da normativa de aplicación.

TERCEIRO.- A consellería achegará o total do financiamento das actuacións, cun orzamento máximo de DOCE MIL EUROS (12.000€) e que se detallan no Anexo I con cargo á aplicación orzamentaria 09.30.751A.622.0, proxecto de gasto 2015/00265, do orzamento de gastos da Dirección Xeral de Comercio e Consumo para o ano 2019.

Os maiores gastos que se deriven da execución do contrato sobre o orzamento de adxudicación, derivados de modificacións contractuais, revisión de prezos ou liquidacións, corresponderán á consellería e requirirán dunha previa addenda a este acordo de colaboración na que se contemple a retención dos maiores créditos precisos. En calquera caso a aprobación de revisións ou modificacións do contrato precisarán a conformidade previa da consellería.

O órgano de contratación, a fundación, iniciará e aprobará o correspondente expediente de contratación, motivando a necesidade do contrato nos termos previstos na lexislación de contratos do sector público, para o que contará tamén coa información facilitada pola consellería.

CUARTA.- A realización das actividades e/ou actos e negocios xurídicos necesarios para a execución dos traballos deste convenio por parte da fundación efectuarase a título gratuíto, sen que exista retribución ou tarifa.

QUINTA.- A eficacia do convenio para a xestión das actuacións, estenderase desde o 1 de xaneiro ata o 10 de decembro de 2019.

SEXTA.- A consellería comprométese a financiar o total das actuacións que se relacionan no Anexo I para a execución dos contratos de subministracións no recinto feiral de A Estrada para os que a fundación será o órgano de contratación.

Con carácter previo ao inicio dos expedientes de contratación acreditarase a plena dispoñibilidade das cantidades que achegará a consellería, mediante a incorporación deste convenio formalizado e certificado de existencia de crédito e retención correspondente na aplicación dos orzamentos de gastos da dirección xeral de Comercio e Consumo.

Nos pregos que rexan as contratacións deberán regularse expresamente que a execución dos contratos levarase a cabo en concorrencia subxectiva na posición do contratante nos termos da Lei 14/2013.

Á fundación corresponderalle a tramitación e a adxudicación do contrato, en nome e por conta de todos os participantes en base a este acordo, aportando a Consellería integramente o prezo do contrato ao adxudicatario, unha vez presentada a documentación xustificativa da recepción dos traballos por parte da fundación (certificado da recepción da obra e os demais que sexan pertinentes) e a factura correspondente por parte do adxudicatario, a través do rexistro electrónico de facturación.

Así, regularase nos pregos de condicións de xeito expreso e claro o órgano de contratación que se ocupará da tramitación, adxudicación e formalización do contrato, a identificación do órgano administrativo con competencias en materia de contabilidade pública, así como a identificación

do órgano destinatario que procederá ao abono das facturas, neste caso a consellería.

Calquera outra modificación no contido deste convenio, requirirá acordo unánime entre a fundación e a consellería.

SÉPTIMA.- Este convenio resolverase por incumprimento total ou parcial dalgunha das cláusulas que o regulan, ou polo transcurso do tempo estipulado sen que se culminen as actividades acordadas, e en particular, de acordo co artigo 51 da Lei 40/2015, do 1 de outubro, de Réxime Xurídico do Sector Público, son causas de resolución do presente convenio:

- 1.- O transcurso do prazo de vixencia sen que se teña acordado a prórroga do mesmo.
  - 2.-O acordo unánime de todos os asinantes.
  - 3.- O incumprimento das obrigas e compromisos asumidos por parte de algún dos asinantes.
- Neste caso, estarase ao disposto no artigo 51 c) da Lei 40/2015, do 1 de outubro, de Réxime Xurídico do Sector Público.
- 4.- Por decisión xudicial declaratoria da nulidade do convenio.
  - 5.- Por calquera outra causa distinta das anteriores prevista no convenio ou noutras leis.

OITAVA.- As causas polas que se pode modificar o presente convenio son:

- 1.-Por acordo unánime dos asinantes.
- 2.-De acordo co artigo 31.4 da Lei 14/2013, do 26 de decembro, de racionalización do sector público autonómico, cando teña como finalidade o logro dos obxectivos de estabilidade e sustentabilidade financeira.

NOVENA.- Para o seguimento e control do cumprimento deste convenio, e para a solución das dúbidas que a súa interpretación poida motivar, créase unha comisión de Seguimento integrada por dous representantes de cada unha das institucións asinantes que poden estar asistidos polos técnicos que estimen oportunos, previa comunicación da súa designación.

Na comisión de Seguimento e Control, informarase sobre os acordos de modificacións ou variacións que poidan producirse na execución do contrato para a súa aprobación, conforme as limitacións da normativa vixente que sexa de aplicación.

DÉCIMA.- De acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos de axudas, subvencións e convenios e de sancións administrativas da Xunta de Galicia, a fundación consinte expresamente a inclusión e publicidade dos datos relevantes referidos ao obxecto deste convenio nos rexistros públicos citados, creados polos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006. Así mesmo consinte na publicación do convenio que esixe a Lei 1/2016, do 18 de xaneiro, de transparencia e bo goberno no artigo 15 referido ás obrigas específicas de información sobre convenios.

UNDÉCIMA.- O presente convenio é de natureza administrativa e consecuentemente, as discrepancias que xurdan na súa aplicación, interpretación e cumprimento serán analizadas e resoltas pola comisión de Seguimento e no seu defecto serán obxecto de procedemento de conflito de atribucións nos termos establecidos nos artigos 18 da Lei 14/2013, de 26 de decembro, de racionalización do sector público autonómico e 13 da Lei 16/2010, de 17 de decembro, de organización e funcionamento da Administración xeral o do sector público autonómico de Galicia.

Este convenio está suxeito ás obrigas de publicidade impostas polo artigo 15 da Lei 1/2016, de 18 de xaneiro, de transparencia e bo goberno.

E, en proba de conformidade, subscríbese este acordo no lugar e data enriba sinalados, por duplicado exemplar e para un único efecto.

POLA XUNTA DE GALICIA  
O conselleiro de Economía, Emprego e  
Industria

POLA FUNDACIÓN  
O Vicepresidente

D.

D.

#### **ANEXO I**

#### **CADRO ECONÓMICO OBXECTO DO ACORDO DE COLABORACIÓN**

|                                                   |            |
|---------------------------------------------------|------------|
| •Cambio de iluminación a Led Pavillón 5(24 focos) | 3.044,40€  |
| •Pintado exterior pavillón 5                      | 6.872,96€  |
| •Ive(21%)                                         | 2.082,64€  |
| •Total                                            | 12.000,00€ |